

# Лүимә СЭрипос



наведи телефон

22.06.2023  
№ 12 (1294)

www.khanty-yasang.ru

Основана 11 февраля 1989 года

E-mail: gazeta@khanty-yasang.ru



**Ты  
номерт  
ловиньтэн:**

Саккон хаснэ  
Ассамблеян ёрн  
пыгыт ёхталасыт

▶ 3

Лүимә нэт  
урыл ёмас  
ляххал

▶ 6-7

Мāнь  
лёккарыг сāv  
тāl рүпитас

▶ 8-9

Щāнь лātнүв  
Элаль тотым  
сāv рүпитэгыт

▶ 11

Ты сараныт  
мāньщи  
нЭныл Элаль  
өлмыгасыт

▶ 13

Мā-вит, йис  
өлупса урыл  
ханьщсахтын  
мāхум

▶ 16

Ты хурит мāньщи хум Владимир Митрофанович Сайнахов пōслым олы. Тынакт 50 тālэ тōвлыс. Хум Хāльўс район Кульпас пāвылт яныгмас, Ханты-Мансийск ўст ханищтахтас, тувыл ўсн акваг та олмыгтас. Владимир Митрофанович овылтыт 10 лōпсыт ловиньтэн.



# Яныг үст нэпакыт урыл потыртавес

**М**ир янытыл сака сав ловиньтан нэпак хансым блы. Касың хөтпа маныр потрыл пумщалахты, тамле нэпак ловиньтаңкве выг, хотыют руц латңыл, хотыют ос такви латңыл ловиньты.

*Москва үст онтоловит фестиваль вәрыглавес, тув сав палыл мэхум вөвиньтәлвөсыт, руц латңыл «Фестиваль национальных литератур народов России» лаввес.*

Красный площадит лүпта этпос 3-6 хөталыт сус яныг шатёр-колпалыт вәрыглавөсыт, мир атхатыгласыт ос танти вәрнэ рүпатаныл урыл потыртасыт. Савыңпәлэ танти латңыл потыртан мэхум ёхталасыт, щань латңыл хансым ловиньтан нэпакыт, журналыт, газетат суссылтасыт.

Касың областьныл, округныл ос крайныл тотым нэпакыт тыналавөсыт. Мирн вәнэ поэтыт ос писателит вөвиньтавөсыт, тән тот стихыт ловиньтасыт.

**Ася Умарова**, чеченкәнэ, няврамыт комикс-хурит пөслуңкве няврамыт ханищтасанэ. Тав няврамыт магсыл хаснэ нэпакыт нөтнэ хуритыл пөслыанэ, ты рүпататэ тав сымыңыщ вәритэ, няврамыт ловиньтан нэпак катын кәсащим вос выганыл.

**Марина Гасанова**, щань латңыт ханищтан колт рүпитан күщай нэ, Дагестан маныл ёхталас. Тот сака сав латңыл мэхум потыртэгыт, касың павылт танти латңыл өлэгыт. Марина няврамыт ёт савсыр проектыт вәрөгыт, щань латңыл вос потыртэгыт, ты магсыл тән пумыщ ёнгилыт вәрыглэгыт ос юн оманыл-әтяныл ёт ос вос ёнгөгыт.

Мирн вәнэ писателит

лекцият ловиньтасыт, ань йист няврамыт люль пищн молях ханьщувлэгыт, тамле вәрмаль ул вос ёмтыс, тананыл ёмас ос пумыщ нэпакытыл пумщалаңкве эри. Стихыт уц хансуңкве өвылтахтын мәнлат поэт хөтпат танти стиханыл мирн ос ловиньтасаныл, тананыл хунтлуңкве сака пумыщ блыс.

Финно-угорский латңытыл хаснэ мэхум тув ёхталасыт. Блогерыг лавнэ хөтпат танти пөслын тинаныл урыл потыртасыт. Мәнлат пыгыт вәти тина-охсат пөслэгыт ос тот саран, удмурт, башкир ос мөт латңытыл потыртэгыт, савсыр ляххалыт вәрөгыт.

Мәнщи хум **Улякши Самбиндалов** тув ос вөвиньтәлвөс, тав Түрвәт павылт вөраян порат тинат пөслы ос «тикток», «инстаграм» ищхйпың лөпсын вәриянэ, тав туп тот нэматыр такви ат потырты, нас тув хотты руц эрыг вәрапи.

Тав лөпсәт снегоходыл, моторхәпыл яласан тинат вәрим өлэгыт, хумус тән вөраёгыт, хул алыщлэгыт, вөрт ёмыгтэгыт – пуссын пөслыанэ, тыил мэхум сака пумщалахтэгыт. Таве Анна Воронкова, щань латңыт ханищтан институт рүпитан нэ, ты фестивальн вөвиньтастэ.

Улякши мөт хум хөтпат вәрнэ рүпатаныл урыл хунтлыс ос такви магсылә төва тәлат номтыс висанэ. Тав өвыл щөс Москван ёхталас, Красный площадит та хөталыт сус



Ася Умарова потырты



А. Шаудуров



Х. Таскараков

ёмыгтас, яныг үс-капаил пумщалахтас.

Улякши Ольга увцитэ ос тув ёхталас, тав ос лави, өвыл щөс Москван ёхтыс, тавён татем пумыщ блыс. Тән урөнтыл мән тах ос янас хансэв.

Мән округвныл Касум павылныл **Евдокия Каксина** фестивальн вөвиньтәлвөс, тав стиханэ «Антология литературы народов России: народная мудрость» нампан нэпак хасвөсыт. Ты яныг нэпакт савсыр мирыт мўтраң потраныл, стиханыл акван-

атвөсыт, сака осың нэпак вәрвөс.

*Касың хөтал тот артистыт танти латңыл эргыт эргысыт, сәңквилтасыт ос йиквсыт. Якутыт, тувинцыт, вепсыт, шорцыт, эвеныт, карелыт ос мөт мэхум тув ёхталасыт, хотыют мөйт суссылтас, хотыют няврамыт ханищтас, тыгле-тувле ёмыгтым, сунсыглахтым тасавит ёмас вәрмальн ханищтахтасүв. Та урыл потрув элалы хансылув.*

Галина КОНДИНА

# Сәккон хаснә Ассамблеян ёрн пыгыт ёхталасыт

**Л**үпта этпос 11 хөталныл 16 хөталэ мус Россия янытыл мәнъләт мэхум «Студвесна» нампа фестивалын Ханты-Мансийск үст акван-атхатыгласыт. Төнт Россия янытыл кит сөтыра арыгкем ағит ос пыгыт тыг ёхталасыт.

Ты пора сус тәнки халанылт ат номинация щирыл кассыт. Төват кәтыл хурит пөслысыт, вәти кина-охсат вәрсыт, эргысыт ос ййквсыт ос нөх-патум ағит, пыгыт жюри-мэхумн пөриявөсыт.

Ненецкий округ Нарьян-Мар үсныл ёрн мәнъләт пыгыт ты ялпың хөталн өс вөвыглавөсыт. Фестиваль өлум порат тән ханищтан хөтпаныл ёт округ Дума колн сасса мэхум Ассамблеян ёхталасыт, тот депутатнә **Татьяна Гоголева** ёт хөнтхатыгласыт. Татьяна Степановна округ Дума рупататэ урыл тәнанылн тох потыртас:

– Ань округ Думат 38 элумхөлас депутатыг өлэгыт, тән халанылт 4 хөтпа – сасса мэхум Ассамблеят рүпитэгыт. Округувт 1 млн 600 сөтыра арыгкем өлнэ элумхөласыт халт туп 30 сөтыра хөтпа – тыи мәнъшит, хантыт ос ёрныт.

Сосса мирыт пөс йис пора тәгыл тыт өлэгыт, өлнэ мав Ханты-Мансийский округыг ты намайвес ос мәнки сәкконыт хаснэв мәгыс Дума тыт вәрвес. Тыт өлнэ сасса мэхум тәнки ләтңаныл, культураныл элалэ вөс тотыяныл, савсыр эрнэ сәкконыт тыт ань пирмайтэгыт.

*Москва үс миркол кўщай Сергей Собянин тыт самын патыс. Тав Думав өвыл кўщаиг өлыс ос сасса мэхум Ассамблея тыт вөс вәраве, сав ёр пиныс.*

Мәнъщи, ханты мэхмыт пөс йис вәрмаяныл хумус элалэ тотыяныл, та урыл мәнъщи нэ өс лавыс. Ос 2021 тәлт Турвәт пәвылт өлум Уй ййквнэ вәрмалэ урыл потыртас ос тот пөслым хурит мүй мэхумн суссылтас. Тав лавыс:

– 1990-иттәлытам «Югра лылыёп» нампа организацият кўщаиг өлсум. Төнт мән өвыл щөс Уй ййквнэ вәрмалэ Белоярский районт вәрыгласүв. Ялпың эргыт, тәныт, тулыглапыт вәнэ яныгпәла хөтпат кәсың тәлныл атимыг ёмтэгыт.

Мәнъләт хөтпат ты урыл вөс пүмщалахтэгыт, пөс потрыт, эргыт, щәнэ ләтың вөс ханищтэгыт, тамле ялпың хөталн вөвыглыянүв. Юи-өвыл щөс мән Хальүс район Турвәт пәвылт Уй ййквсув.

Тув сав мәнъләт ағит ос пыгыт ёхталасыт. Пөс порат тамле ялпың хөталыт ағит ос пыгыт тәнки халанылт вәйхатасыт ос төват ётыл пүри вәрсыт.

Депутатнә «Мәнэ үскве» ныврамыт үщлахтын мав урыл өс потыртас.



Т.С. Гоголева потырты



Ёрн пыгыт ййквөгыт



Акван-атхатыглам хөтпат

Пәвлың ныврамыт хумус тот үщлахтэгыт, кина суссылтас. Мөтыт тәл ты үщлахтын мав 30 тәлэ тах төвлы.

Ты юи-пәлт мәнъләт ёрн пыгыт тәнки урыл өс потыртасыт. Тән Нарьян-Мар үст В.Г. Волков намыл намаим аграрно-экономический техникумт ос И.П. Выучейский намыл пиным социально-

гуманитарный колледжит ханищтахтэгыт. Пыгыт Нельмин-Нос пәвылныл өлэгыт. Тән пуссын мәнътагыт «Маймбава» нампа ансамблн ялантасыт, тот ёрн мэхум ййкваныл, эрганыл ханищтасаныл. Ханты-Мансийск үст өлум фестивалит тән өс ёрн мир ййквыт ййквсыт.

Людмила ТЕТКИНА



# Хон мāt мәнъщи нэпакув өвылтытл потыртасыт

**Н**ови Сад намба  
уc Сербия  
мāt Войводина  
автономный округет,  
Дунай я вātат үнлы.  
Ты яныг үст сāvсыр  
мāхум акв ляпат  
өлэгыт: сербыт,  
хорватыт, венгрыт,  
словакыт, словеныт,  
русыныт, румыныт,  
украинцат, немцыт  
ос сāv мōт мирыт.



Та үст университет өс  
рүпиты, тот ляххал тотнэ  
наука кафедратэ касың  
тāl мирхал конферен-  
ция вāрыгы. Тав Унса-  
хыг, руц щирыл Мост, тох  
ты лāваве. Ты тālт олум  
конференциян мāхум  
хүрумхуйпловит щёс ак-  
ван-атхатыглālсыт. Тāн  
США мāныл, Испанияныл,  
Полонияныл, Венгрияныл  
тув ёхталасыт.

Сāvсыр мōт элы хон мā-  
нытныл ёхталам учёный  
хотпатн мōт мирыт урыл,  
ляххал тотнэ хōтпат тār-  
витуң рүпатаныл ос олуп-  
саныл урыл потрыт хўнт-  
луңкве ос потыртаңкве  
пұмаш олыс.

Ам ты конференциян  
онтоловит тāl ялантэгум,  
ты тāl Финляндия мā-  
ныл, Хельсинки үс уни-  
верситетныл тув ялсум.  
Учёный хōтпатн ам «Лүй-  
мā сәрипос» мәнъщи га-  
зетат ляххалыт хаснэ ос  
тāнаныл элаль тотнэ хōт-  
пат рүпатаныл урыл по-  
тыртасум. Тārвитуң по-  
рат тāн ляххалыт хумус  
ёмщакв хансэгыт, ам тот  
лāтың лāvсум. Мōт хон  
мāныл ёхталам мир сака  
пұмшалахтасыт.


Бен Шорс, США мāныл

ёхталам учёный ойка,  
«сэмыл лāглуп» (руц щир-  
ыл «черноногие», англ.  
щирыл «blackfoot») намба  
американский сосса мā-  
хум ляххал тотнэ хōтпа-  
ныл урыл потыртас.

Ты хум «сэмыл лāглуп»  
мирн нётым рупиты. Тāн  
щāнь лātңытыл нэматыр  
нэпак ат хансаве, газета  
өс ат оныщэгыт. Ты мāнь  
мирныл олнэ тōва кārкам  
хōтпаныл тāнти мираныл  
урыл тина пōслуңкв патсыт,  
сāvыңпālэ яныгхōтпат  
пōсляныл. Бен Шорс  
тав ты мәнъщи мир урыл,  
«Лүймā сәрипос» газета  
урыл хоса титыглахтас,  
ляххал хаснэ мәнъщи  
хōтпат рүпатал тав сака  
пұмшалахтас.

Учёный хōтпат коны-  
пал мāнылат агит-пыгыт  
тув өс вōвиньтālвёсыт,  
тāн ляххал тотнэ хōтпаг  
юн ханищтахтэгыт. Ты нйв-  
рамыт Словенияныл, Хор-  
ватияныл, Боснияныл ос  
Сербияныл тув ёхталасыт.

Тāн мāгсыланыл намың-  
суиң хōтпат ханищтап вā-  
рыгласыт. Та юи-пālт ты  
агит-пыгыт кина суссыл-  
тан фестивальн вōввёсыт,  
тāн вāt нупыл акв кина  
суссыт. Ты вāти кина-ох-



сатт сāvсыр тārвитуң  
вāрмалит ос лүоль вārнэ  
утыт суссылтавёсыт: кол  
тāl хультум хōтпат хумус  
өлэгыт, нэквет нупыл  
лүоль вārнэ вāрмаль урыл,  
сāvсыр лүоль агм өщнэ  
хōтпат урыл, мāнь пāv-  
лытт олнэ матум элум-  
хōласн нётнэ хōтпат рү-

патаныл урыл ты кинатт  
суссылтавес.

Конференция юи-  
пālт учёный хōтпат ос  
ханищтахтын агит-пы-  
гыт аквьёт мōт колн ми-  
насыт, тэпьялым тот хоса  
потыртасыт.

Чилла Хорват

Тамле ты пұмыш пищмал мāн тётвесүв. Венгр āги  
Чилла Хорват яныг пұмашипа лātңыл лāvилүв, тав  
мāн мәнъщи мирув урыл, мәнъщи лātңув ос «Лүймā  
сәрипос» газета урыл элы хон мāt та потырти. Тав вārнэ  
рүпататэ кастыл мāн ань мāk элы мāt вāңкв патавёв.

Бен Шорс хумн хōтпан паща лāтың өс тётэв. Та  
«сэмыл лāглуп» мир мәнъщи мāхманув урыл өс вос  
вāгыт. Матъёмас тамле ёмас сымың хōтпат өлэгыт, тāн  
ёраныл хосыт мощцаг хультум мирыт наманыл мā  
янытыл та суйтэгыт.

Мәнъщи газетат рүпитан хōтпат

Чилла Хорват кётум хурит

# Сосса мир ань тыг мус реестрын хансавет



**Ю**вле хультум этпост мирколт ищхйпың ут хосыт рупитан хөтпат лавсыт, Федеральное агентство по делам национальностей России (ФАДН) кол щөпитан реестрын манасавит сосса хөтпат наманыл тув хасвөсыт. Ос ань тыгыл элалы хумыс нэпакыт эрнэ щирыл хансуңкве ос кетуңкве тув рөви, тән та урыл потыртасыт.

**Александр Скурихин**, округувт сыремус өлнэ вәрмалит щирыл рупитан департамент күщай хум лавыс, манасавит сосса хөтпа (мәньщи, Ас махум ос ёрныт) округув өлэгыт ос тән халанылт мансавит элмхөлас наманыл реестрын хансым өлэгыт, тән халанылт хотьютаныл та колныл нэпакыт ювле кетвөсыт.

2020 тал «Всероссийский перепись населения» нампа вәрмалы блыс, та нэпакыт щирыл тарапатыс: округувт 32 сөтыра арыгкем сосса махум блы, 4 сөтыра 800 элмхөлас сосса мирыт пөс блупса элалы тотыяныл, тән сәлы үрим вөр мәт өлэгыт, вөраёгыт ос хул алышлэгыт.

Мән округув сосса мир мәгыс сав нөтмил вара-ве, таимәгыс ФАДН колт ты реестр ты щөпитаве. Ищхйпың ут хосыт латың кетуңкве рөви, элалы ювле нэпак ёхты, хөтпа та програмат хумус хансым блы: Ас хөтпаг, мәньщиг манос ёрныт.

Хотьют такви нэпаканэ

ат те вәрсанэ, тав тананыл ты щирыл кетуңкве вөрми:

1. Москва үст өлнэ ФАДН колн танки ялуңкве вөрмөгыт;

2. заявление-нэпак хансуңкве ос вәрим копият нотариус палт печать тущтуңкве ос почта щирыл кетуңкве эри;

3. МФЦ колт кетуңкве рови;

4. «Госуслуги» йильпи щирыл рупитанкве паты, интернет лөпсэ хосыт ты нэпак кетуңкве рови.

**Тимур Цыбиков, ФАДН колт рупитан хум, потыртас,**



МФЦ колт

**сосса хөтпан нэпаканэ манрыг реестрын кетуңкве эри. Тав лавыс:**

– Ань ты порат Россия янытыл Лүймәт, Сибирь ос Дальний Востокыт өлнэ сосса мирыт пуссын танки нэпаканыл ты колн кетыяныл. Югра мәныл **10,5 сөтыра** элмхөлас нэпаканыл пирмайтасанүв, ос округувт 32 сөтыра арыгкем сосса махум өлэгыт.

Няврамыт 14 тәланыл иң ат ке төвлыс, тән щәнаныл-әщаныл ёт акванхансавет ос тән ётаныл аквөёт ловиньтавет, хоты няврам 14 тәлэ төвлыс ке, тән паспорт ёт танки ФАДН колн нэпакыт кетуңкве вөрмөгыт.

Ты тәл мән округув ос ФАДН кол ёт ты рупата вәрилүв, махманув йильпи щирыл Госуслуги интернет лөпсыт танки нэпакыт кетуңкве патэгыт.

**Та махманув, хотьют почта щирыл адресын пицма көтыс, Александр Скурихин тох лавыс:**

– Хотьют ФАДН колн нэпакыт танки көтсыт, рү-

питан хөтпат сунсэгыт, эрнэ щирыл кетум нэпакыт аман ати. Хотьют ёмашакв нэпаканэ щөпитасанэ, тав наме тара реестрын хансавет. Та юи-палт ФАДН колныл ювле пицман көтаве, тот хансым блы, хунь хөтпа наме ты реестрын хасвөс.

Ос хотьют МФЦ кол щирыл нэпакыт көтыс, тән МФЦ колн ялуңкве вөрмөгыт, тот уведомленият катын-паттуңкве рөви. Мән лавуңкве таңхөв, МФЦ кол щирыл сака ёмас нэпак кетуңкве. Тот рупитан хөтпат заявление хансуңкве нөтэгыт, эрнэ щирыл нэпакыт щөпитэгыт ос ФАДН колт танки көтэгыт.

**Юрий Угорелов, МФЦ кол күщай хум лавыс:**

– Мән ань ос йильпи щирыл рупитэв, махманув МФЦ кол пәлыл нэпакыт кетуңкве вөрмөгыт. Тот рупитан хөтпат аквписыг нөтэгыт ос ищхйпың ут хосыт ФАДН колн нэпакыт көтэгыт. Мөлты тәл МФЦ кол хосыт 8 сөтыра хөтпаныл нэпакыт пирмайтавөсыт.

Вөрт өлнэ сосса махум палт МФЦ колт рупитан хөтпат вертолөтыл тән палтаныл ялантэгыт ос тот щөмьят ёт рупитэгыт, нэпакыт эрнэ щирыл хансуңкве нөтэгыт.

Ты тәл яңк нәтнэ этпост мән йильпи щирыл уведомление көтэв. МФЦ колн махманув ёхталэгыт ос нэпак ФАДН колн электронный почта щирыл хансэгыт, тананыл ювле пицма ёхты, тот хансым блы, хунь тав наме реестрын хасвөс.

**Хотьют такви нэпаканэ ат те вәрсанэ, тән өс вөрияныл, наманыл та реестр-тәлан вөс хансавет.**

Оксана АЛБИНА



# Лүймә нәт урыл ёмас ляххал

Санкт-Петербург үст лүпта этпос 5–7 хөталытт «Лүймә нәт форумн» нә хөтпат акван-атхатыгласыт. Ты яныг сапрәни Лүймә, Сибирь ос хөтал нәглың ёрт өлнә соссa мирыт Ассоциацият рүпитан хөтпат вәрсаныл, тән 28 сәвсыр мәныл (субъектныл) өлэгыт, пунк кўшаиг Григорий Ледков тув пәриим ылы, ты хөтпа Россия сенаторыг рүпиты.

Нәквет мәгыс Россия Президент Владимир Путин тәтум ләтҗе вәңын хөтпатән Магомедсалам Магомедовн ловиньта-вес: «Тыхөтал нә хөтпат пұмыщ ос эрнә вәрмалит вәрнәнныл мәгыс сәвсыр лильпи рүпатат өлэгыт, хөт тән мираныл ёмас өлнә мәгыс нәтмил вәруңкве вәрмәгыт. Янас ләвёв, мән элалы ос ань вәрнәв хольт регионьтн нәтмилыт вәруңкве патэв, таңхёв, миранув өлупсаныл ёмаснувөг вог ылы, культураныл элалы вог то-тыяныл. Ты вәрмалит вәрнә мәгыс элы хөтал кастыл номсахтым аквёт рүпитаңкве эри».

Совет Федерацият пунк-тотнә кўшай нә Валентина Матвиенко сапрәнит өс ылыс, тав ләвыс: «Ты нәтнә яныг посың Таврический колт мирытн нәтмил вәрнә хөтпат, няврамыт ханищтан нәт, ләккарыт, мәщтыр хөтпат, учёныит, кўшайт пуссын акван-атхатасыт.

Нән өлнә мәнын, Лүймә, Сибирь, хөтал нәглын ёр – ты Россия мәгыс мак ёр



Г.Н. Карелова, В.И. Матвиенко, М.М. Магомедов

регионьт, тот найпос тәнә мәгыс ос промышленность мәгыс сәв тәлат вәравет, тот шарщит хосыт яныг нәинхәпыт тәлы-туве яласэгыт, тот мән-вит ўргалан мәгыс сәв ёмас рүпата вәраве. Вәим, тыхөтал, хунь ищхыпың утыт квалтапавёсыт, ань мәнә пәвлытныл махум яныг ўсытн вәнтлэгыт, пәс йис махум өлупсал өлуңкве ань өлнә хөтпатн тәр-витыңыг акваг та ёмты.

Ам номсытепт, туп Лүймәт өлнә нәт пәс пораныл хультум өлупса, хунь махум вөраяңкве, хул алышлаңкве, сәлыт ян-малтаңкве эрнә щирыл хассыт, иң элалы тотуңкве вәрмияныл.

Тыг ёхтум нәквет халаныл вәнә ос вәруңкве хаснә вәрмалит урыл тыт потыртаңкве патэгыт, тонт мөт хөтпат тах тәрапаттэгыт, хомус пәс йис өлупса ўргалаңкве, хомус щәняныл-әщаныл вәрум тәлат элалы тотуңкве, хомус щәнә ләтың ат ты-пылтаңкве.

Лүймәт өлнә соссa мирыт өлупсаныл ёмаснувөг патнә мәгыс вәрнә нәт-милыт, ханищтапыт, пус-малтахтын вәрмалит ёмасыг вәруңкве эрэгыт, ты хосыт хөтпат пәс йис тәгыл вәрнә рүпатаныл, өлупсаныл, эрганыл-потраныл элалы өлнә нот ыныщуңкве тах патэгыт».

Валентина Матвиенко



Н.В. Комарова

тит нәг, Виктория Пенет ос Диана Киджи, урыл янас ләтың ләвыс. Виктория Пенет – чукча нә, тав хум хөтпат ёт щәрщит вөрай, рүпататэ ләваве «промышленный морской охотник», нә «Анкальыт» морзверобой общинат пунк-тотнә кўшаиг ылы.

Диана Киджи – мән-лат ағи, тавён вәт нупыл нәлолов тәл, тав атомный ледоколт кўшай вәңын хөтпаг ылы.

Санкт-Петербург үст хұрум хөтал сыс сәв яныг кўшайт мир ёт хөнтхат-тыгласыт, мөт-мөт вәрмалит урыл потыртасыт, сәккон-нәпакыт хултсыт, тән хосытаныл вәрмалит эрнә щирыл вог минэгыт.



Югра мәныл ялум нәквет





В. Пенет вөртыпал нупыл пöслым öлы



Потрыт хўнтлан мэхум

Хөтпат өт хөнтхатасыт: Галина Карелова, Инна Святенко, Ольга Баталина, Татьяна Яковлева ос мөт хөтпат.

Югра маныл өхталам нэт номтаныл өмасыг өлсыт, тән өтаныл Санкт-Петербургың округ күщай **Наталья Комарова** ялыс. Тав атхатам мирын пашалахтын латың лавыс, потыртас, хомус округувт сасса мэхум өлэгыт, маныр вәрэгыт, хомус мащтырлэгыт, манхурип нёт-милыл варавет.

Тав потре оигпам порат ищхйпың ут хосыт такви вөр колэтыл Степан Кечимов мэхум өт потрамас, сáлың мэхум урыл ос такви колтáглэ урыл акв-тит латың лавыс, няврамыт ань ты йист юн öлым, ищхйпың ут өрыл ишколат ханищтахтуңкве вөрмэгыт. Тамле вэрмалль сáв мät иң ат варавет, таимáгыс хөтпатн ты тэла тара-паттуңкве сака пумыщ öлыс.

Форум рупататэ хөтáлят юи-пáлт янас колнакытт минас. Мán тамле потрыт хўнтлаңкве ялсүв: «Роль женщин Севера в развитии креативных индустрий».

Тот мán мавныл ялум нэ **Елена Федотова** Касум павыл урыл потыртас, тав лавыс: «Пáвлувт 1 сөтыра

атсаттем элумхөлас öлы, ты сáраныт, хантыт, өрныт, тән халанылт сáвыңпáлэ сáлы ўрим өлэгыт.

Тит тáл ми́нам порат 20 община акван-юрщхатым рупитаңкве патсыт, хотьют маныр вáруңкве хáсы, та вэрмалль элалль тоты, ты хосыт рупатат ущ өмасыг нáңкуңкве патсыт, төнт мирытн ущ эрмыгласыт».

**Лидия Кручинина**, ительмен нэ, такви потре тох намаястэ – «Ам сáв вэрмалит вáруңкве хáснэ нэ». Нэ «Эльвель» нампа йиквнэ ансамбль урыл потыртас, манрыг ты вэрмалль вáруңкве номылматас, хомус йиквуңкве хáснэ хөтпат тиссанэ, акван-атсанэ, хөт ань йикваныл суссылтыяныл, хоталь ялантэгыт ос хоты мирыт өт хөнтхатыгглэгыт.

Мáнылат áги **Хайвалам Вакувагир** щáняге-áщаге кеты ос эвенки хөтпаг өлэг. Хайвалам таквинáтэ блогерыг лавитэ, тав вэрнэ рупататэ такви намэтыл намаястэ – XAIVALAM.

Áги кеты ос эвенки мирыг öщнэ хорамыт маснутытн пöслыянэ, тувыл ищхйпың ут хосыт суссылтыянэ, хотьютын тамле пормас эрмыглы, тавэныл өвтэгыт.

Иң акв нэ потре пум-сáлахтым хўнтлыслүв, тав

наме **Вероника Осипова**. Нэ уйльта мирныл öлы, ты мэхум Сахалинт өлэгыт, тән туп 500 хөтпа сáвитаныл. Вероника хўл совыт тармыл хурит пöслы. Тав урёт ос хомус хўл сөв эрнэ щирыл щөпитаңкве эри, мán мөтыт газетат янас потыр тах хансэв.

Ань ос ты сапрáни юи-öвыл хөталэ урыл латың лавэв. Лүпта этпос 7 хөталт нэт «Думский залат» акван-атхатасыт, күщайт латңаныл хўнтлысаныл.

**Анна Отке**, Россия сенаторыг рупитан нэ, лавыс: «Мán форумув Россия мáгыс тáрвитың порат мины, ань мán хум хөтпанув мáv вуянтым хөнтлэгыт, тән уранылт кáсың нэ такви потрёт лавыс, тав сыме ты урыл áгмың».

Тамле латңыт Нина Вейсáлова, Светлана Санги, Людмила Алфэрова, Зоя Максүнова ос Любовь Христофорова öс лавсыт. Ты хөнтлын вэрмалль моляхнув өл вос пöбиттаве, савалан мэхум öлупсаныл öлнэ темыг вос паты.

Ты хөтпат сáв өмас латың мирн лавсыт. Тән лáвнэныл щирыл: **«Лүймáт öлнэ нэт – ты кáркам, тáксар, сэръяр, номтың ос мўтраң хөтпат. Тән хосытаныл колтáгланыл**

**сөтыңыщ-щуниңыщ öлы, нявраманыл щáгтым-мовиньтым хáйтыгтэгыт, тән хосытаныл пөс йис мөйтыт-потрыт, эргыт-йиквыт ат өрувлáвэсыт, тән хосытаныл колың мэхманыл рэгың ос хорамың маснут öныщэгыт, тэпың пасан вэрэгыт, элалль öлнэ өмас номтыл өлэгыт».**


Мán ос та урыл лавэв, лүпта этпос 5–7 хөталытт нэквет мáгыс сáвсыр лэккарыт рупитасыт. Төва нэквет луваныл-нэвляныл, сыманыл-мáйтаныл сусвэсыт, áгм те хөнтвэс, тэрпил хасвэсыт.

Ты сака өмас вэрмалиг öлыс, төват лавсыт, öлнэ пáвланылт нэматыр лэккар кол áтим, пўльницат мус 500 вэрыстатем минуңкве эри. Тамле потрыт нэпакн өл-хасвэсыт, тән өтаныл министрат рупитаңкве патэгыт.

Ань ты ятил нэквет пумáщипа латың ищхйпың ут хосыт хансэгыт, пöслым хурит тув вэрэгыт, та хөтпатн, хотьютыт ты яныг вэрмалль лүймá мирыт мáгыс вáруңкве вуйхатасыт ос вáрсыт, тáнаныл янытлыяныл.

Светлана САДОМИНА

# Мәнь ләккарыг сәв тәл рӯпитас



И.К. Поята

**М**әньши нә Ирина Константиновна Поята, такви бпарищ наме Албина, сәв тәл мәнь ләккарыг Хәльүс пұльницат рӯпитас. 2023 тәл бвылтахтама порат пенсиян минас.

Ам Ирина Константиновна җт хонхатыгласум, блупсатә, щәмьятә ос рӯпататә урыл китыгласум. Мәньши нә такви урәтыл тох потыртас:

– Ам Ләпмус пәвылныл бләгум, тот самын патсум. Щәмьяв яныг блыс, сәв нъяврам. Нила класс мус Ләпмуст ханищтахтасум,

тувыл Кульпас пәвыл интернатн кәтвәсум. 6 классын хунь ялантасум, номтум җхтыс, мәхум пусмалтаңкве тах патәгум.

Школа юи-пәлт 1981-1984 тәлытт Салехард җст училищат мәнь ләккарыг ханищтахтасум. Та җсн җрт әгим җт минасмән. Хәльүс мус җхтысамән, тав әнумн

ләвыс: «Тыт хультымән, акв тәл почтат рӯпITYMән, олн сәлымән, мөтыт тәл тах Салехард җсн минымән».

Ам ат кәсашасум, ләвсум: «Ам рӯтанум номсәгыт, ам Салехард җсн минасум. Омам тах ләваве: «Агин, насати, Хәльүст блы, ат ханищтахты». Омам тох уркуптаңкве ат патылум».

Ам Әлалә минасум, җрт әгим тот та хультыс. Ғтыл Хәльүст хонхатсумән, тав ләвыс: «Манрыг наң җтын тонт ат минасум, ханищтахтуңкве әрыс, ань колкан ловтым ты рӯпитәгум». Ам җтум тот акв әги Зоя Лаверина ханищтахтас, тыхалт мәньши воссыг тот әтим блыс.

Тонт тай җмас пора блыс, мән җмашакв бщвәсүв, нәтвәсүв. Стипендия-олныл пуссын ойтвәсүв, ты мус номилум, акв әтпос 16 солкбви 50 кәролн висүв. Тонт Салехард җснлыл Хәльүс мус товлыңхәпыл ялантасум, та мус щәлыңыг блсум (мувиньты).

Ань студентыт мансәвит солкбвил ойтавәт? Тыкем олныл тәтәл усуңкве рөви. Мән тай җмашакв

блсүв. Ханищтахтам порам – җмас порам. Туи сәвсыр стройотрядын кәтыгавәсүв, ам Краснодарский крайн, Волгоград җсн ос мөт мән ялсум. Тот сәвсыр рӯпата вәрсүв, картопка унттысүв, помидорыт, пил ос мөт тәнут атсүв. Рӯпитан мәгсыл олныл ойтвәсүв.

## Сымын патум нәтнә әги

Ханищтахтуңкве әстласум, Тарко-Сале пәвылн рӯпитаңкве кәтвәсум, кит тәл тот рӯпитасум. Та пәвылт бйкам җт вәйхатасум, Юрам «комсомольский путәвка» щирыл тув җхтыс. Тав экскаваторщикыг рӯпитас. Акв малтым хөтал рӯпитаңкве кәтвәс ос ты мәшинаң тәгыл витн әлаты щалтыс, кон-порыгмаңкве әлымас. Яныг мәшинатә витн та минас. Такви ос пұльницан пинвәс.

Ам тонт смена щирыл рӯпитасум. Итипәлаг җхтысум, палатан щалтсум, китыглахтәгум: «Поята хотьют?» Тав тәра рбңхувлас: «Ам». Ләвыслум: «Минымән, уколыл вәрилум».



Пури вәрманыл порат



Няврамаге ос апыгрищанә җт



Ётыл Юрам ты урыл по-тыртас: «Палатан кантың ағи шалтыс, такыш рәңхувлас: «Поята, хотьют?» Ам та нётнэ ағи нупыл туп аңкватасум, сымум алаты кон-порыгмас».

Хүрум хөтал ювле ми-нас, Юра а́нумн лавыс: «Наң а́нумн тара сымын патсын, ам ётум Молда-виян минёгын?» Ам тай хоса ат номсахтасум, та-кем нётнэ, карс пыг а́нумн нэг тотуңкве таңхи, тав ётэ минуңкве тара та ас-тапасум.

Тонт сас хус тал яныт олсумён, номт сав хунь о́цсумён, тав хоса ат номсахтас, ам о́с элы мән минуңкве тара кәса-щасум. Молдавиян та тот-вёсум, тот олмыгтасмён. Ам пүльницат няврам са-мын паттым отделеният рүпитасум.

### Пүльницат олум пүмаш вәрмаль

Тәрвитуңыщ ёмтсум, пора ёхтыс, рүпатаныл пөхын ми́насум. Аквё́т рүпитам лёккар палт ми-нуңкве э́ссамтасум, мот пүльницан вөвхатасум. Тонт нёт сартын пүльни-цан пинвёсыт. Ам о́с пүль-ницан кётвёсум.

Акв хөталт лёккар ам палтум ёхтыс, китыглахты: «Наң рүтанын халт воен-ныйт олэ́гыт?» Ам ювле лавёгум: «А́ти». Тав элалы потырты: «Ань хум сво-нитас, китыглахты: «Сер-жант Поята нявраме самын патыс?»»

Ам лёккар нупыл юв-ле лавёгум: «Ам мән лёккарыг олэ́гум, «воен-ный билет» нэ́пакум щырыл сержантыг хасвёсум. Ань, улпыл, аким китыглахтас, тав а́нум «Сержант Поята» намайстэ».

Лёккарум мощ лөля-хблас, номсахтас ос ла-выс: «Ам пөхумт сав

мән лёккарыт рүпитэ́гыт, тән пуссын «рядовой» нам о́ньщёгыт, наң тай «сержант!» Улпыл, сака кәркамыг олэ́гыт, тара ке тамле намыл майвёсын».

Лёккар ми́нас, ам пөхум олнэ нэ́квет маткем та мувиньтасыт. Пыгум самын хунь патыс, лёккарум о́ста лягалас: «Рядовой Поята самын ты патыс».

### О́лнэ мавн ювле ёхтысүв

Приднестровье мят хөнтлын нак хунь о́выл-тахтас, мән Хальё́сн ёх-тысүв, тыт олмыгтасүв. Ам пүльницан терапев-тический отделеният сав тал рүпитасум. Та юи-палт ос физиотерапия вәрмаль щырыл э́лалы ханищтахтасум.

Ты пүсмалтан вәрмаль щырыл Хальё́с пүльницат хус тал рүпитасум. Ань сав няврам ос яныт хөтпат а́гмыл ёмталэ́гыт, акваг сав мир ёхталы. Рүпатам ам сака э́руптасум, ма́хум тот пусмалтаңкве му́стыс.

### Салехард үст ёмас ма́хум олэ́гыт

О́йкаментыл аква пыг, аква а́ги янмалтасмён. Тэн сас Хальё́ст щёмьяң та́гыл олэ́г. Пыгмён наме Толя, а́гимён – Маша.

Юрам ёт Хальё́ст яныт кол у́нттысамён. Таяныт кол-капай у́нттым лов тал у́щлахтуңкве ат ялантасүв. 2012 талт Молдавиян ми-насүв. Тув миннэ ма́гсыл ам билет-нэ́пакыт тара висум, ювле ат ёвтсум.

Тот олнэ рүтанув ёт ва-щиньтахтасүв, ювле ми-ныгтасүв, тувыл Приобье мус билет щар а́тим о́лыс. Тонт Лабытнанги үс мус билет ёвтсум. Няврамагум лавсагум: «Ань Ямал мән минэ́в, Салехард үс нупыл тах сунсэ́в».

Лабытнанги үс мус



Юрий о́йкатэ

поездыл ёхтысүв, тот па-ром щырыл Салехард үсн тотвёсүв. Нә́лми вә́тат хум лөляхө́лыс, гости-ница-кол мус ма́навн тотуңкве лавхатас. Ма-шинал ми́насүв, ам туп сунсыглахтасум, ханищ-тахтам үсум щар ат хань-щислум, такем нётнэ́г ёмтыс, тамле ёмас колыт у́нттувёсыт, ёмас лёңхыт вәрвёсыт.

Хум ам нупыл а́ңкватас ос китыглахты: «Наң тох сунсыглахтэ́гын, о́выл щёс Салехард үсн ёхтысын?» Ам лавёгум: «Ам тыт ха-нищтахтасум, 1984 тал пәсныл воссыг тыг ат ёх-таласум». Тав лавыс: «Ам нә́нан ань үс тах сус-сылтылум».

Ам ос лавёгум: «Мән у́щлахтын ма́ныл юв минэ́в, олн сака ат о́нь-щёв». Тав Салехард үс ма́навн суссылтас ос олн щар ат вис. Тувыл гости-ницан ёхтысүв, аква колнак 800 солкөви тынэ о́лыс.

Мән китыглахтэ́в: «Тын-тә́лнув колнак а́тим? Мән тасавит олн ат о́ньщёв». Ты гостиница кўщай ма́нав эт хўлуңкве тә́ртсанэ́, сав олн ат вис. Ань тай номсэ́гум, ты нётнэ́ үст, тамле ёмас, сымың ма́хум олэ́гыт, олн ат выгыт!

Китыт хөталт нә́иңха-пыл Хальё́сн ми́насүв. Тө́ва порат номсэ́гум, тонт билет тув ат ке ёвтсүв, ань ты мус Салехард үсн ат ялнувум. Ань Тарко-Сале үсн ялуңкве таңхёгум.

Юрам сав тал «Березо-вострой» колт рүпитас, ань о́с пенсият о́лы. Хўл алыщлаңкве сака э́руп-ты. Тасавит тал тыт о́лы, ма́нщит холыт ня́рнёвыль, ня́рхул тэ́г. Ам хўл сака ат тэ́гум, нё́выль тэ́ңкве тай э́руптэ́гум.

Ам Ирина Константи-новнан потре ма́гсыл пү-машипа ла́тың кётэ́гум. Ма́ньщи нэ́ ёт потыртаңкве сака пүмаш о́лыс. Тав сака потрың, о́щхуль вә́руңкве хә́сы.

Мән, редакция рүпи-тан ма́хум, Ирана Конс-тантиновна лёккарыт янытлан хөтал ос 60 тә́лэ тө́влум кастыл янытлылүв, тав самын патум хөталэ́ яныгпө́ль этпос китыт хөталэ́т о́лыс. Хөтал тав ма́гсылэ́ акваг посыңыг вос посты, кә́сың хөтал сав щагт вос тоты.

Ирина Константиновна, пус кә́т, пус ла́гыл сав тал олэ́н! Тө́рум ёт, О́тыр ёт!

Людмила ТЕТКИНА

**М**әньши хум Владимир Митрофанович Сайнахов сәв тәл Ханты-Мансийск үст олы, Театр кукол колт рүпиты. Лүпта этпос 11 хөталт 50 тәлэ төвлыс. Намхөталэ кастыл тав этэ потрамасум, китыглахтасум, хоты рүтныл олы, хөт яныгмас. Нән ань Элалы Владимир Митрофанович потре ловиньтэлбн.

– Ам 1973 тәлт Хәльүс район Кульпас пәвилт самын патсум. Атям Митрофан Ильич Сайнахов. Тав яныг каңке Николай хөнтлын мән ялыс, тот сакватәлвес, акв ләгылпәлыл юв ёхтыс. Экватэ наме Александра Никитична, аги-пыг янмалтасыб.

Николай ёлыпал увшитэ Анастасия Ильинична Сайнахова ақув сәв тәл Ханты-Мансийск үст олыс, ЮГУт мәньлат махум ханищтым рүпитас. Динара агитэ ань нъявраманэ ос апыгрищанэ ёт үст олы. Китыт увшитэ Елена Ильинична ойкатәнт акв пыг янмалтәлсыг, наме Вячеслав. Тән халанылт атям щар мән олыс. Олмөт потыртәлыс, рүт махманыл Лүски пәвилныл олсыт.

Омам Ирина Алексеевна Мёсыг пәвил нэ, такви опарищ наме Кугина. Тав ос акв каңк оныщас Егор ос кит увши – Домна ос Мария.

Омагум-әтягум Кульпаст акван-минасыг, сәт нъяврам янмалтасыб. Щар яныг увшиюв Ольга, тувыл мән самын патсүв – Илья, Альбина, Сергей, Евдокия, ам ос щар мән ййгрищув Светлана. Тән ань пуссын Кульпаст олэгыт,

## Нъяврамыт мәгыс руц ақанит вәрөгум



*В. Сайнахов Экватэ, каңканэ-увшиянэ ос апыгрищанэ ёт пөслым олы*

нъявраманыл яныгмасыт, төванылщёмьяңыгёмтсыт.

**– Школа асламын юипәлт Элалы хөт ханищтахтасын?**

– 1993 тәлт Москва үсн художественный ремёслат школан ханищтахтуңке минасум. Хәльүс районныл мәньлат хөтпат тот ос ханищтахтасыт, төват Саранпәвилныл олсыт. Олнэ колнакытыл майлувесүв, хүрум тәл тот мәщтырласум. Тувыл ювле Кульпасн минасум, школан патхатасум, нъяврамыт пөслуңке ос кәтыл матыр-әти вәруңке ханищтасанум.

Эквამ наме Марина, такви опарищ наме Волдина. Тав этэ мәньтагыл юртыңыщ олсумән, акв классыт ханищтахтасмән, школат акв пасан вәтат уңлысамән. 1993 тәлт акван-минасамән, Андрей пыгумән самын патыс.

1999 тәлт элалы ханищтахтуңке номылматсумән, Ханты-Мансийск үст оленэ Югорский государственный универ-

ситетн йисумән. Ам мәньши ләтың ос литература учителиг ханищтахтасум, Марина руц ләтың ос литература учителиг ханищтахтас. ЮГУ кол 2005 тәлт асласлумән.

Эквәм сәв тәл нэпак ошнэ колт рүпиты. Ам овлэт Ас-угорский институтт научный сотрудник рүпитасум, тувыл Культура нампә колн патхатыгласум, ётыл кит тәл Элумхөлас ос Мә-вит музейт рүпитасум, та юипәлт үсувт оленэ Театр кукол колн патхатасум. Тот 15 тәл ты рүпитэгум, нъяврамыт мәгыс руц ақанит вәрөгум.

**– Наң вәрнэ тәлан улпыл пұмыщ манос тәрвитың рүпитаңке?**

– Тав улпыл кәсың рүпата хольт, төванакт тәрвитың нак ёмталы – акв хотты хөтал кастыл ақанянув вәруңке ат те алымөв, эткотиль мус ос ушлахтын хөталт рүпитэв.

Тувыл ос хунь ақанянув пуссын щёпитыанүв, артистанувн нъяврамытн суссылтавет, ёнгалтавет.

Ты 15 тәл сус мән сәв спектаклит ос мөйттыт суссылтасүв, ты кастыл сыре-сыр ақанит щёпитасүв. Нъяврамыт хунь сунсэгыт, сәв мовиньтэгыт, кәтпатта рәтэгыт. Ты мәгыс номтанув ёмасыт, вәглүв, мав вәрнэ тәлав агирищитн-пыгрищитн яныг щәгт тоты.

Андрей пыгумән най харыгтан мәт рүпиты. Экватэнтыл хүрум аги янмалтэг – Алиса, Ангелина ос Каролина, пуссын школат ханищтахтэгыт. Ам тән ётаныл төванакт мәньши ләтңыл потыртэгум, мощ торгамтэгыт. Мән порат номилум, омав мәньши эргыт эргыс, мөйттыт мөйттыс. Ань тай акваг руц ләтың нупыл та патсүв.

*Мән, «Лүймә сэрипос» газета вәрнэ махум, Владимир Митрофанович намхөталэт янытлылүв! Сәв тәл пус кәт, пус ләгыл вос олы, сөтыңыщ, щуниңыщ вос олы!*

**Светлана  
РОМБАНДЕЕВА**



# Щәнь ләтнүв элаль тотым сәв рупитэгыт



Д. Вынгилев потырты

**Д**енис Вынгилев «Төрүм Аҗ латың» ишхыпың ут хосыт мәньши латың толмацлан проектэ бвылтыт китыгласлум. Мблалнүв тав аквьёт рупитан мэхманэ ёт ты рупата астылсаныл. Ань мэхум щёпт общнэ телефонанылт манос компьютеранылт мәньши ләтнүв руц ләтнүв толмацлаңкве вёрмёгыт.

*Тән ань мот проект-тәла щёпитэгыт ос таве элаль тотнэ магыс рупитэгыт. Денис вәрнэ тәланыл урыл тох лавыс:*

– 2023 тәлт мән ишхыпың ут хосыт мәньши ләтнүв вәнэ ос хунтаман магыс рупатав элаль ос вәрыслүв – мән ань мәньши латың хаництан ос пёс накыт вәнэ магыс потыртан ийльпи лөпс тот щёпитэв.

Мән сәв тәл сыс мәньши мэхум ләтнэ, пёс накыт, пёс

блупсатэ бвылтыт хансым потрыт ос ляххалыт пуссын акван-атсанүв ос 2018 тәл пәсыл вәрим проектүв палт янытэт та ишхыпың лөпсын щёпитыянүв. Руцит ләвнэныл хольт акв яныг «ресурс» атэв, тувыл кәсың хөтпа тавен матыр-ати пүмцалан вәрмалит тот вос кинсыянэ.

Хөтпа кос щәнь ләтнүв хаництанүв ке, ляххалыт, нас ловиньтан нэпакыт манос потрыт хунтлан нэпакыт акв мат тот вос хөнтнүванэ. Мән ань

тамле нётмил вәрнэ магыс рупитэв.

Тамле тәлат пуссын акв мән щёпитаңкве ке, мән 2025 тәл оигпан мус астаңкве таңхилүв. Ты рупатав мән мәнки сәлум олнытыл вәруңкве бвылтаслүв, таимәгыс китхурум талыт сыс вәрилүв. Мәнки халувт тох номсэв ос ләвёв: лашал минэгын – элаль патэгын. Ань ты хөтал вәрнэ рупатав яныг ос мэхумн сака эри.

Проектүв урыл «Профессионалы. РФ» намаим хаництапын ялумүв порат сәв мэхум вәңкве патсыт. Москва үсн тонт Россия янытыл мәньлат хөтпат вөвиньтәлвёсыт. ООН рупитан колныл ёхталан хөтпат мән проектүв урыл ос потыртасыт. Тав щәнь ләтнүв элаль тотнэ щирыл шар ёмас ос мак эрнэ тәлаг ләввёс.

Йильпи тәл бвылтаңтам порат мән «Төрүм Аҗ латың» толмацлан лөпсув школатыт ос университетыт хаництахтын ныврамытн суссылтаңкве патыслүв.

Өвлэт Хәльүс район Кульпасн, Кимкьясуйн, Лөпмусн ос Саранпәвылн ялсүв. Тувыл Санкт-Петербург үст А.И. Герцен нампа университетт хаництахтын агит-пыгыт ёт хөнтхатыгласүв.

Хоталь ялсүв, школат манос мот мәтт мән ты ишхыпың ут хосыт латың хаництан нак вәрнэв магыс пүмашипа ләтнүл ләввёсув. Мот лүймә мэхум акв тамле лөпс ань вәруңкве ос таңхёгыт.

Ань кәсың хөтпа мәнь-

щи латың вәңкве кәсащи ке, тав ишхыпың ут хосыт хаництаңкве вёрмитэ. Тав мән лөпсув «mansitranslator.ru» хансым вос хөнтытэ. Мән сәвсыр ләтнүв акв предложениян атыянүв, та щирыл тот мән потрыт толмацлаңкве рөвёгыт. Ань тыг мус сәв предложеният акван-атсанүв.

**Мән номсэв, 2023-2024 тәлыг сыс тамле приложения ос онлайн-версия вәрум лөпсув янытэт нән кәсалылың ос пүмцалаңкве патылың. Ты приложение щирыл хумус рупитаңкв эри, мән мэхум хаництаңкве патыянүв.**

Мәньши латың вәгың ке, потыртэгың, тыи сака ёмас. Нән ты лөпсув күстырыг торгамтылың. Мот мэхумн ёнгильт щёпитэв ос тән лашалт тах хаництахтэгыт. Пёс порат ныврамыт щёмьят яныгманэныл порат щәнь латың хунтамлым ос торгамтым хаництасаныл.

Ань мән щёпитам ёнгилувт ныврамыт лөльсаң лягалэгыт ке, нэмхотыют лөль оценка тәнанылн ат түщты, ат лявильтавет, ат эссамтавет.

Тән ань пуссын щёпт общнэ телефонаныл нупыл сунсым үнлантэгыт, мот хаштәл программат ос мори пбслым кинат ул вос сунсэгыт, мән латың хаництан вәрмалит пүмшиг щёпитыянүв.

Мәньши ләтнүв ос сәңквылтап сүе нэмхуньт ул вос сөймёг.

Тамара  
МЕРОВА





Лүпта Этпост ханищтахтам нъяврамыт



Пыгрищиг квāлыг сōхтэг

## Вōрың мāt ōлуңкве ёмас

Лүпта Этпост нъяврамыт Ханты-Мансийск үст өлнэ «Тōрум Маа» музейт рүпитан хōтпатн вōрың мāt өлуңкве ханищтавёсыт. Ты тэла мāныщи щырыл лāваве «Тāксар мāхум» (рущ лātңыл «Крепкие люди»).

Агирищит-пыгрищит лүпта этпост 12 хōталэныл 16 хōталэ мус музейт кон, колыт-сүмьяхыт ос ййвыт ляпат сāv ёмас, эрнэ тэлан ханищтахтасыт – āращ пālтсыт, вōрн тотыглан хүнтмил щёпитасыт, нъялың ёвтыт вāрсыт. Тувыл халанылт кассыт – сунсовыт үлтта поргысыт, квāлыг сōхтысыт, нъял пāхвтысыт. Квāлгың паркын ялсыт, тот мощ пор-

гащласыт, хāхталахтасыт, өс халанылт кассыт.

Ты тэла «Тōрум Маа» музейт рүпитан хум **Вячеслав Кондин** вāруңкве номылматастэ. Вячеслав Юрьевич сāvсыр проектт щёпитан отделт пуңктоты, тав лāвыс:

– «Тāксар мāхум» программа нъяврамыт мāгыс щёпитаслүв. Кāсың туи тāн ётаныл рүпитэв



Паркыт нумынт лаквёгыт

– аqv смена лүпта этпост, мōт смена бйттур этпост вāрыглэв. Агирищит-пыгрищит музейн ат хōтал ёхталэгыт, тыт хүрум щёс тāн ётаныл ёнгасэв, ханищтыянүв, вōрт хумус өлуңкве эри. Нāй пёламтаңкве вос хāсэгыт, хүнтмиланылн эрнэ пормас ёт вос пинэгыт, та маныр. Тыи вāңкве ат те патэгыт, вōрт хот-тыпёгыт, āращ пālтуңкве ос колпāl вāруңкве ат вёрмёгыт тах.

– Овыл хōтал нъяврамыт нупыл музей кол урыл потыртасүв. Тāнанылн тыт өлнэ мāныщи ос ханты колыт, сүмьяхыт, хāпыт, суныт ос мōт пормасыт суссылтасанүв. Тувыл хүнтмил щёпитасыт, потыртасанүв, вōрн миннэныл порат ёт маныр пинуңкве эри. Вōрың мāt хот ул вос тыпёгыт, лёңх хумус кинсуңкве эри, ханищтасанүв.

Тынакт 22 нъяврам ёхталас. Систёмт, тāнанылн тыт мўсты, ёмас номтыл өлсыт, лāтың хүнтлысыт, щāгтым ханищтахтасыт. Хунь вāве, эрың вōрн нэмхуньт ат минэгыт, ос ты мāk эрнэ тэлат вāңкве патыяныл.

Ома-āтяныл мāн палтув ёхталэгыт, сāv ёмас лāтың лāвёгыт, матьёмас нъявраманыл эрнэ тэлан ханищтыянүв. Мōт этпост өс тыг вōвхатэгыт, наманыл вос хансыянүв. Ам номсэгум, ты сака эрнэ, пўмыщ тэла, таимāгыс āгирищит-пыгрищит мāн палтув щāгтым хāйтэгыт.

**Екатерина Балина** өс нъяврамыт ёт рүпитас. Тав нучный сотрудикигыт өлы, тох потыртас:

**Светлана РОМБАНДЕЕВА**



Нъяврамыт хāхталахтын пормасытыл маставет



**Пермь мāt өлнэ сараныт тох лāвавет – коми-пермяки. Тāн лātңаныл моц мōт хурипа, удмуртыт ёт потыртанэныл порат халанылт ёмащакв торгамтахтэгыт. Ты мир хотыл нэглис, сака пёс потыр өлы.**

Түяг Ханты-Мансийск үст өлум нйврамыт магыс конференцият ты потыр акв āги потыртастэ, наме **Арина Баталова**. Тав ханищтан нэтэ ёт Пермь үсныл ёхталас. Потре сака пумыщ өлыс. Потрёт тав «Кудым-Ош» нампа Нй-Отыраныл урыл потыртас.

### Яныг үсаныл хумус үнттувес

Пёс потранылт тох потыртаве, тāн өлнэ мāнылт яныг похатур өлыс, наме Кудым. Тав такви мātэ вуянтым сāvсыр мāt яласас, мātэ-витэ ялыс. Аквмат порат Иньва нампа я вātан ёхтыс, тот татем нильтаң āврах өлыс. Нумыл āңкватас, мātэ мувлахи сака нётнэ, тākыщ та рōңхувлас: «Ты мāt мир өлуңкв паты». Та пāsныл тот яныг үс үнттувес, лāваве – Кудымкар.

Кудым-Ош омаэт ве-сар нэг өлыс, āтятэ ос пупāпщиныл нэглум кāнащиг өлыс. Аще āтимыг ёмтме порат пыг яныгмас. Мāхманылн тав өс кāнащиг та үнттувес. Кātэт сув пувим мā янытыл ёмыгтас, сыплувн ос пупāпщи хуритэ тагатым өныщистэ.

Мāхум лāвыгласыт, тав сака яныг ёр өныщис. Матыр лйоль вāруңкв тавён нэмхотыют ат вёрмыс. Нюлми өныщи те, нюлмитэныл мā тармыл хуи, нюлмитэ тāра та пусми.

Хотты мир тāн нупыланыл хōнтлуңкв ювыт те, тав яныг вōт вāруңкв

## Ты сараныт мāныщи нэныл Элаль өлмыгтасыт



Ханищтан нэтэ ёт



Арина Баталова

вёрмыс, я хумплыңыг ёмтапи, та хōнтлын утыт хот-рохтэгыт, тāра сысы та оёгыт.

Тав мōт мир ёт тына-лахтуңкв сака кāсащас. Элы мāн ялантас, тув сāv вōруй сов тоты, матыр пормасн тот пёнтыянэ, юв тотыянэ. Аквнакт нйньпум самыт такви өлнэ мātэн тотыс, мāхманэ нйньпум үнттуңкв ос янмалтаңкв ханищтасанэ. Хāпыт ос тёрныл сāvсыр эрнэ пормас вāруңкв тав пуссын хāсыс.

### Мāныщи āги нэг тотыстэ

Пёс потранылт потыртаве, тāн үсанылт сака лйоль номт өщнэ нэ олыс, хум акваг ёл-сāтыстэ. Такос үрхаты, хунь Кудым щама-алаве.

Аквмат порат ты нэ тавён лāвыс, мāныщи кāнащ āги өныщи, таве нэг вос тотытэ. Ос такви тай вāгтэ, мāныщи кāнащ тав āгитэ хāйталан хумыт пуссын щама-алыянэ.

Тāн āги кāсаланэныл порат, матрыг пуссын ювле минуңкв молямлэгыт, таимāгыс кāнащ хот-кант-маяве ос тāнаныл щама та юныгтыянэ.

Тув миннэтэ порат Кудым акв мāныщи хōтпан потыртавес, та āги сака нёттал. Хумыт тавёныл хот-рохтэгыт, нэг тотуңкв щар ат кāсацияныл. Элаль тав лāvвес, самагётыл āги хунь кāсалытэ, ул вос рохты, такви сыеме вос хўнтлы, тōнт тах тāра-паты.

Мāныщи кāнащ колн та ёхтыс, юв щалтыс. Сунсы, āги ўнлы, сэмыл атуп кāтагётыл-лāглагётыл – щар нимсарэква хурипа. Пāляге вāңнаге мус ханэг. Хум щар хот-рохтыс, ос такви та лātңыт номиянэ. Илттыг āги тав нупылэ āңкватас, самагёт самбит нэглис. Хум мāныщи āги сынумтастэ, я-ты, āги татем нётнэг та ёмтапас. Наме Костэ өлыс, нэг та тотыстэ.

Мōт потрыт ты урыл ос тох потыртаве. Костэ āги щāнён намыл пāңкыл сартыглавес, вōруй совыл лап-мāнигтālвес, ёхталан хумыт таве нэг ул вос выганыл. Ос Кудым хум юв-щалтме юи-пāлт, āги вильтэтыл вōруй сов мощ хот-вистэ, хумн вос кāсалаве.

Тох вāрыс, тэн акван-минасбг, нйвраманэн самын патсыт, ос коми-

пермяк нампа сараныт та нэглисыт.

Лāvёгыт, тав 150 тāl өлыс. Сāv щёс хотталы алаты тотыглавес. Ос такви мирён эрнэтэ магыс Элаль өлнэ ёр хōнтыглас. Аквмат порат лāvыс, тав хотталы те щалты, ўльпа ййвныл хāпыл вос вāраве, хāпетёр лāквыл лап вос рāтаве. Ос мирён, коми-пермякытн, нётнэ магыс хуньт такви ювле тах ёхты.

### Āги эсгувес

Арина ты урыл потыртаме порат Кудым-Ош хуритэ суссылтастэ, такви вāрме. Нйврамытн ос конференцият өлум мāхумн тав ты урыл хоса титыглавес. Тав ётэ ёхталам ханищтан нэ Арина сака эсгыстэ.

Āгикве ханищтахтуңкв сака кāсащи, щāнь лātңе ханищтытэ. Сараныттамле ты пёс йис потыр өныщёгыт.

Аман сōль, мāныщи нэквел ты мир нэглис. Пёс потыр те потыртаве, ул сōль тох ты өлыс.

Валентина  
ВАСИЛЬЕВА

## Камчатка мāt өлнэ соссa мāхум

**Ө**лнэ мāv янытыл ань мир халанылт янгыщ руш лātңыл потыртэгыт, ос кāсың мāt соссa мāхум өлэгыт, тāнти лāтың өньщэгыт, пёс өлупсаныл элалы тотыяныл. Элеонора Дмитриевна Лысянская Камчатский край мāt өлы, мирколт соссa мāхум мāгыс нётмил вārнэ отелт пуңктоты. Нэ потыртас, тāн мāнанылт мансāвит соссa мир өлы, пёс өлупса ос щāнь лāтың элалы тотнэ мāгыс манхурип рүпата вārёгыт.



Э.Д. Лысянская

– Мāн өлнэ мāvт 14 сōтыра лятатем соссa хōтпа өлы: **корякыт** – 6. 640 хōтпа, **ительменыт** – 2. 394, **эвеныт** – 1. 872, **чукчат** – 1. 496, **камчадалыт** – 1. 151, **алеутыт** – 401, **эскимосыт** – 14 хōтпа.

Соссa мāхманув янгыщ хўл алыщлэгыт, мōрсың колтāгыл сāлы ўрим яласы. Ань мāнылат хōтпат сāлы ўруңкве сака ат таңхёгыт, рүпата олнаныл нōх ат нэгли. Ты ювле хулытум тāлытт миркол пāлыл нётуңкве мощ патвёсыт.

Ань мāн мāv янытыл рүпитан кўцаит ФАДН (Федеральное агентство по делам национальностей) пāлыл сака пашралавет, соссa мāхманувн вос нётэгыт, рүпата олныл ёмашакв вос ойтыяныл. Ты организация такви өс нёты, культура ос пёс өлупса нōх-вōрмалтан мāгыс тāн кāсың тāl 15 млн сāвиттем солкōви тāстыглэгыт.

– **Элеонора Дмитриевна, наң соссa мир колтāгылныл өлэгыт?**

– Ам эвен мир щёмьят самын патсум. Мāн өс мāнытит холыт Лүймā,

Сибирь ос Дальний Восток янытыл өлнэ мощцаг хулытум мирыг лāвавёв. Эвен мāхум Камчаткат, Якутият ос Магаданский областыт өлэгыт.

*Юн мāхманум пуссын эвен лātңыл потыртэгыт. Омам 1935 тāлт самын патыс, āтям 1926 тāлт. Тэң рүт мāхманэң сāлы ўрим өлсыт. Школат ханищтахтамён сыс интернатт өлсыг, яныгмасыг. Та порат янге-мāне пуссын щāнь лātңыл потыртасыт. Ань ты йист мāн пуссын руш лātңын патсўв, нйвраманув тāнти лātңаныл торың ат хўлыгыяныл, хумус вāңкв патыяныл.*

Яныгпōль этпост ам Ханты-Мансийск ўсн ёхталасум, тыт Россия янытыл өлнэ сāvсыр мирыт хōнтхатыглап вāрыглавес. Мощцаг хулытум мāхум сāv мāныл өлсыт, тāн ётаныл потрамасум, тэланыл урыл китыгласанум. Ямал, Якутия ос нāн округынт өлум хōтпат татем кārкамыт, сāлы ўрнэ тэла торыг эрнэ сāкконыт щёпитэгыт, мāнылат нэт ос хумит вāти кина-охсат вāруңкве хāsэгыт, өлнэ мāнаныл өвылтыт пүм-

щиг потыртэгыт. Тōваныл тыгле-тувле яласан мāхум (туристыт) тāнти палтаныл тотыгыяныл, мāнаныл суссылтыяныл. Ты мāгыс өлн сэлэгыт.

Ханты ос мāныщи нйврамыт ханищтап урыл сака ёмас потыр хўнтлысум. Тāн ань вōрт өлнэ āги-пыганыл ищхйпың ут хосыт ханищтахтэгыт, мōт мāн ат тотыглавет, интернатт ат өлэгыт. Тох өлуңкве атхунь ёмас, нйврамыт ома-āтяныл лятат яныгмёгыт, щāнь лātңыл потыртэгыт. Сунсэгыт, ань колтāгыл мāхманыл манхурип тэлат вārёгыт, хумус щаквщэгыт, тыхал ханищтахтэгыт. Пёс өлупсаныл мāнытāгыл вāңкв патыяныл. Ты сака ёмас тэла.

– **Нāн лātңын школат нйврамытн ханищтаве?**

– Эвен мāхум сāvыңпālэ Быстринский районт өлэгыт, тот нйврамыт лātңув ханищтыяныл. Корякский округт щāнь лāтың 12 школатыт ханищтаве – коряк мāхум, чукчат ос ительменыт лāтың.

Мāн пуссын вāглув, шар мāk таи – кāсың мāt мāхум нйвраманыл ёт

щāнь лātңыл юн вос потыртэгыт, кояныл тāнти лātңаныл мāнытāгыл вос хўлыяныл, тōнт тах таве атхунь вāңкв патыяныл.

– **Мāн мāvт Ханты-Мансийск ўс коныпал хотталыт ялсын?**

– Ўсныл воссыг нэм-хотталыт ат ялсум, вёрмынувум те, соссa мāхум өлнэ мāн ялнувум. Кāсалаңкве пўмыщ, мāныщи ос ханты мир хумус өлэгыт, лātңаныл хўнтамланувлум.

*Ханты-Мансийск ўст өлыглан хōнтхатыглапыт тāра нāңки, миркол кўцаит округ соссa мирыт мāгыс сāv ёмас тэлат вārёгыт, эрнэ сāкконыт щёпитэгыт, хансэгыт. Сāлы ўрнэ мāхманыл өс сака ёмашакв нётыяныл.*

Ханты-Мансийскыт сāv нётнэ кол өлы. Тынакт «Югра-Классик» колт рүпитасўв. Татем яныг колкапай, сāv колнак өньщи. Мāн мāvт тамле кол āтим. Элы хōн мāхум хоттынакт мāн палтув ёхтуңкве щёпитахтэгыт те, аман хоталыт минэгыт, тавагт.

Таимāгыс ам хунь тыт өвыл щёс өлсум, суссум, хумус нāн өлэгыт, юв ёхтысум, кўцаянув нупыл потыртасум. Тувыл мāн аквёет номсахтасўв, ань соссa миранув өлупсаныл элалы тотнэ мāгыс, лātңаныл ханищтан мāгыс сакати акв хотты кол ўнттуңкве эри.

Тōнт мāн мāvт өлнэ соссa мирыт ос кўцаит өс аквтох акван вāтихал атхатыглаңкве патэгыт, аквёет сāv эрнэ тэлат вārёгыт тах.

Светлана  
РОМБАНДЕЕВА



## Сәв ёмас тәлат вәри

**С**аранпәвил нә Марина Владимировна Керцер мәнь нъяврамыт үрнә «Оленёнок» намба колт рүпиты. Тав тот сыре-сыр касылыт вәри ос пёс мәхум өлупсаныл урыл потырты. Ты элы-пәлт Марина Владимировна нәй харыгтан колт рүпитас, тонт мәхум лылыяныл нәгылтан мәгыс ханищтапыт щёпитәлыс.



Вит тармыл ос нәй пёламлан порат лёль вәрмалит ул вос ёмталасыт, ань ты садикёт ос «Поиск» намба нъяврамыт ялантан центрыт тав үргалахтын урокыт вәри. Саран мәхум эрганыл ос ййкваныл ханищтан «Дёля Авко» («Окка») намба кружок щёпитас.

Тув ялантан агирищит-пырищит мблал сәлы үрнә мәхум ялпың хөталт эргим ййквсыт. Тан пуссын саран маснудыт мас-түвёсыт, ты супыт Варвара Прокопьевна Хатанзееван йөнтвёсыт.

Яныгнув нъяврамыт «Мича купальника» намба кружокн ялантёгыт. Тот Марина Владимировна пёс мәхум мўтра наканыл урыл потырты. Тав

пәвилт өлнә матумпәла хөтпат китыгылянә ос тананылныл сәв мўтрат вәг. Тот матыр хаштәл утыт тәра-патты ос такви нётмил вәрнә номтэт элаль тотыянә. Нә эргункве өс хәсы, таимәгыс «Радуга» («Нюлы кис») ансамблин яланты.

Ты этпост садикт нъяврамыт мәгыс этнокультурный «Тандора» лагерь пәлыг-пусвес. Тан тот мәньщит ос саран мәхум пёс порат хумус өлсыт, манхурип лүптал, пилыл пусмалтахтасыт, пуссын ты өвилтыт вәңкве патёгыт. Ань мбтыт газетат тот блыглан тәлат урыл потыр хансэв тах.

Тамара МЕРОВА

## Эрганә ос ййкванә элаль тотавет

**Х**анты-Мансийскат өлнә хантыт ос мәньщит «Югра лылыёп» намба колн вбвиньтәл-вёсыт. Тот Маргарита Фёдоровна Рябова кәстысаныл, та хөталт тав 65 тәлэ төвлынув ос эква вәт сәграпнал этпост 2020 атимыг ёмтыс.



Ф.П. Иштимирова

Маргарита Рябова Ваньщеват пәвилт өлмёт сәв тәл сасса мәхум эрганыл ос ййкваныл акванатсанә ос тувыл тот өлнә нъяврамыт мәгыс «Тутые» («Огонёк») намба ййквнә группа вәрыс. Ётыл та нъяврамыт халт хўрум агит Белоярский үст «Увас хурамат» ййквнә кол вәрсыт.

Өвил пуңктотнә нәг тот Фаина Павловна Иштимирова блыс, тав юипәлт Надежда Борисовна Костылева ос ань Стелла

Валерьевна Тришкина тот кўщаиг патыс. Ты тәлт яныгпөль этпост ты ййквнә кол 35 тәлэ төвлуме кастыл янытлавес. Ань Фаина Иштимирова ос Стелла Тришкина тәнки ханищтан нэтән кәстуңкве ёхталасыг, сымын эрнә ләтың ләвсыг ос Стелла Валерьевна мәхумн ййквыт суссылтас.

Людмила Романовна Хомляк Нягань үсныл ёхталас, тав М.Ф. Рябова ёт сәв тәл ханты ос мәньщи эргыт хөт-әти эргыгласыг, ййвыт ййквыгласыг. Тән «Петуш, Петуш кумие» пўмыщ ёнгён ос «Бурановские бабушки» эргум эрганыл ханты ләтңыл толмашлым мәхумн эргысыг.

2019 тәлт Маргарита Фёдоровна Ханты-Мансийск үст эргын ос ййквнә ханищтап вәрыгламе порат тамле ләтың ләвыглас: «Ам ләтың вәрсум, пёс накыт ханищтыянув ос элаль тотыянув».

Ань ты номтэ, сөль, мөт мәхумн тәлаг тотаве. Пёс накытэлальтотнә вәрмаль тав Юлия ос Александра агиягён ат ёрувлавес. Тән омадән кәстыглан этипәла щёпитасыг, рўтанән ос мўй хөтпат тув вөвыгласыг. Кәсыңаныл ёмас ләтың ләвыс. Юлия «Хәйтнут эрыг» группа ёт «Ома» иильпи эрыг эргысыт.

Тамара МЕРОВА

Лүймә сәрипос

(Северная заря)

№ 12 (1294), 22.06.2023

Соучредители

Дума, Правительство  
ХМАО – Югры

Издатель

Департамент молодежной  
политики, гражданских  
инициатив и внешних связей  
ХМАО – Югры

Редакция

Директор, гл. редактор –  
Динисламова С.С.  
Телефон (3467) 33-36-82

Заместитель директора –  
Кондина Г.Р.  
Телефон (3467) 33-22-72

Ответственный секретарь –  
Узель В.В.  
Телефон (3467) 33-23-09

Адрес редакции и издателя:  
628011, г.Ханты-Мансийск,  
ул.Комсомольская, 31  
тел./факс (3467) 33-17-52

Е-mail: gazeta@khanty-yasang.ru  
Газета размещена на сайте  
www.khanty-yasang.ru

Отпечатано:

ООО «Новости Югры-  
Производство» г. Сургут,  
ул. Маяковского, д. 14.

Индексы 04399, 54399

Тираж 1710 экз.  
Заказ 2893

Цена свободная

Мнение авторов  
публикаций не  
обязательно отражает  
точку зрения редакции.

Газета зарегистрирована  
Управлением Федеральной

службы по надзору  
в сфере связи,  
информационных  
технологий и массовых  
коммуникаций  
по Тюменской области,  
ХМАО-Югре и ЯНАО.

Свидетельство  
о регистрации  
ПИ №ТУ 72-00795  
от 23 января 2013 г.

12+



А.В. Кениг котилът лѳли



Е.А. Зайцева потырты

## Мā-вит, йис ѳлупса урыл ханьщсахтын хѳтпат

**К**āсың мā-ломт, кāсың я - такви ййс потыр, эрыг, мѳйт ѳныщи.

Мощ мѳлалнув мāн Хулюмсѳнт пāвлувн хѳрум учѳный хѳтпат ѳхталāсыт: мā-вит сунсыглым, ййс ѳлупса урыл кисхатым, ханьщсахтым яласасыт.

Кениг Александр Владимирович ос Зайцева Евгения Александровна сас яныг нѳпакың учѳный хѳтпаг ѳлѳгыт, археологыг рѳпитѳгыт. Сотников Дмитрий Леонидович кина пѳслан мāt рѳпиты, мā-вит урыл ос намың-суиң мирн вāнѳ хѳтпат, ѳмщакв рѳпитан мāхум урыл кина пѳслы.

Округ янытыл Хāльѳс мā шар хильтāлыг ѳлы: тыт мātѳ сāвыңпālѳ яңкыл-мāң, туи яласан лѳх āтим, туп вертолѳтыл ѳхтуңкв рѳви. Таи мāгыс мѳрсың порат учѳный хѳтпат тыг ѳхталѳгыт, матыр кисхат-нѳ рѳпата вāрѳгыт.

Д.Л. Сотников аквматѳрт Ханты-Мансийск ѳст Попова Светлана Алексеевна, мāньщи учѳный хѳтпаг, ѳт хѳнтхатыглам. Светлана Алексеевна ты ѳр урыл, (Тагт я урыл) Вāңкыр-нѳл кѳрас урыл тавѳн потыртат.

Тѳнт тавѳн такем сымн щāлтум ты мā, ты я, Вāңкыр-нѳл кѳрас самагѳтыл сунсуңкв тахмаястѳ. Сѳль ман āти, тамле кѳрас ѳлы? Ос таи мāгыс, ты кѳрас āңкватāлуңкв Ягрим пāsныл Мāнья-сѳнт мус я хосыт тапалыт мā тыт ты яласѳгыт.

Хулюмсѳнтыт мāхум ѳт хѳнтхатыглан мāгыс ѳлпѳйтсасыт, «Фортуна» колт яласам лѳңханыл урыл потыртасыт, кит кина-лѳмт суссылтасыт.

ѳвлѳт Фарман Салманов урыл кина ѳлыс: хумыс та ѳйка мāнки лѳймā ѳрувт рѳпитас, хумыс ѳвыл газ тыт хѳнтас. Тувыл ханты

лѳккар āги урыл кина ѳлыс: хумыс яныг хѳнт ѳлум порат мāнь лѳккар āги Елена Сагандукова Проточный (Посалты) пāвылн лѳккарыг рѳ-питаңкв кѳтвѳс.

Яныг хѳнт оигпам юипālт āги Омск ѳсн лѳккарыг ханищтахтуңкв ялыс, тувыл Ханты-Мансийск ѳст мāхум пусмалтым яныг лѳккарыг ѳлыс, тав хосытѳтл Югра мāt āгм пусумлан вāрмаль ань ты хѳтал мус ѳмщакв пусумлаве.

Д.Л. Сотников акваг пѳс ѳлум лѳңхыт хосыт яласы, хѳт пѳмаш мāt ѳлѳгыт – кинан пѳслыянѳ, тувыл интернет тāра ос Югра канал хосыт ты кинат кā-салаңкв рѳви.

Кос хоты мā, кос хоты вѳртакви щирѳтыл нѳтнѳг ѳлы. Тыт яласам мāхум, тāн нас хунь яласасыт, тāн ханьщсахтым ты мāt яласасыт.

Светлана Алексеевна лāвум щирыл, сāвсыр ййс потырт ловиньтан щирыл, сѳль, Вāңкыр-нѳл кѳрас ѳлнѳтѳ, пѳс ѳлум пāвыл ѳре Искарский ѳсыг лāввѳс, ос мātѳ хашхаты.

Ййс потырт хосытыл, мѳйтыт щирыл мāнки мāv ѳс ханищтаңкв рѳви. Ты урыл нѳпакыт хансуңкв рѳви, кина пѳслаңкв рѳви, олн сѳлуңкв рѳви.



Акван-атхатыглам хѳтпат

Анна АЛГАДЪЕВА